

四庫全書

集部

欽定四庫全書

集部

弇州續稿卷一百四十六

詳校官編修

臣潘庭筠

侍讀臣孫球覆勘

總校官進士

臣楊懋珩

校對官編修

臣徐立綱

謄錄監生

臣任穎

欽定四庫全書

弇州續稿卷一百四十六

明 王世貞 撰

文部

像贊

有序

吳中往詒像贊

有序

吳中往詒像贊者故百有十六歲周翁壽誼翰林編修

高先生啟前工部郎張先生適都昌令俞先生貞木

布衣王光庵先生賓陝西按察使王公英給事中黃公  
鉞太子少師贈少師榮國姚恭靖公廣孝吏部左侍郎  
贈尚書許公斯溫左副都御史吳文恪公訥按察僉事  
直道陳公祚詹事府少詹事贈禮部右侍郎劉文恭公  
鉉御醫盛先生寅太子太保贈少保陳僖敏公鑑太子  
太保俞公士悅太常卿夏公皋禮部主事吳公凱處士  
杜東原先生璫參政祝公顥武功伯大學士徐公有貞  
浙江提學副使張先生和進士鄭先生文康吏部左侍

其意義其有不相連屬者則益之于兩字之間苟又有不明不盡者則又益之于本行之外學者讀本文而覽旁注不見其意義之不足也惟易旁注則有前圖者易之為易其本也圖象而已文王周公孔子之書實為圖象作注脚故明此經者不得不求其本也河出圖洛出書天不愛道泄諸象數一可已二何居作河圖洛書合一圖第一聖人之則之也八卦成列而又因而重之其傳于今也各有橫圖圓圖而六十四卦圓圖中又有方

圖則亦悉矣帝出乎震成乎艮其方位之象又何為哉  
作先天後天合一圖第二先天後天其始其終既各有  
序矣連山歸藏首艮首坤今不能知而周易首乾坤終  
既未濟經分上下其間卦序乃復如彼作周易卦序圖  
第三卦變也卦主也互體也卦數也卦位也納甲也之  
六者時雜見于經傳必各著其全使人可通考焉可也  
作六圖第四淳安夏氏有讀易十字樞愚平日竊窺于  
易得三大義二者經傳訓釋之機要也則以附六圖之

後聖人處憂患之道自履至巽其傳古其指深以之名  
義殆未足以盡之也作三陳九卦圖第五揲著以求卦  
因變而用爻比義從長宜勿拘一說作著卦變占圖說  
第六夫子言著卦之德曰圓曰方固非其直曰七奇八  
偶而已作著七卦八圖第七邵子天根月窟之吟非為  
今易安注脚也豫章蕭氏周易卦序之學區別于三畫  
六畫之原而象意昭融玩味乎正變始終之故而教道  
明著前纂為圖今錄其全文于後而係以邵子之詩履

運處身同一揆也作三十六宮圖說第八八圖為之前而後周易旁注可得而讀矣

葉宗茂哀詩序

新安葉宗茂有清才年僅四十有四卒于金陵邸見聞者哀其遭時之不偶也為之賦詩而里之老友朱升為之序序曰宗茂葉濂翁之子也生二歲移家于蓼自其幼以敏給聞稍長治進士業從余復卿先生學戴氏記歲丁亥歸就鄉籍試有司明年予歸自燕山取道至蓼



太僕寺卿顧公存仁按察僉事皇甫先生訪南京刑部  
尚書錢公邦彥按察副使沈公啓四川布政陳公鏊禮  
部左侍郎贈尚書瞿文懿公景淳尚寶司少卿陸公師  
道布衣彭隆池先生年布衣俞先生允文先右都御史  
贈兵部尚書公諱太子太保大學士贈少保嚴文靖公  
訥布衣陸包山先生治太子少保南京吏部尚書贈太  
子太保袁安節公洪愈兵科左給事徐先生師曾少司  
寇雨亭陳公瓚質山黃先生姬水太僕寺丞直內閣歸

先生有光應天府丞王公執禮都察院右副都御史贈  
兵部左侍郎張公任山東按察副使袁公尊尼南京兵  
部右侍郎顧公章志浙江按察副使張公振之亡弟太  
常寺少卿世懋河南按察副使王公鼎爵都督僉事鎮  
守浙江總兵官楊公尚英凡一百十二人皆吾吳中賢  
懿炳炳自明始者也大者樹德砥行羽翼聖道股肱王  
室次亦奔走䟽附批鱗犯顏直臣循吏之流也含章韜  
鍔斯所以山澤之臞據藻修辭斯所以執文之英老成

代徃典型杳絕借彼膚相永之丹青計亦左矣稍叙其  
事附以咏言離之尚茫然合之斯可徵哉然則楚莊何  
必色驚於優孟北海無煩呼飲於虎賁也詩云高山仰  
止景行行止僕雖不敏竊有志焉然而榱棟莫任譖譖  
散佚況於遺像掌故曷考非力所及寧無挂漏所期同  
志推而廣之云爾

周翁壽誼者崑山人也有隱德高皇帝洪武之六年癸  
丑翁一百有一十歲矣蘇州守魏觀始行鄉飲禮賓翁

而首之又六年高皇帝召見便殿賜宴慰撫有加予冠帶給驛舟楫槩遣還踰年乃卒計翁生當在宋之淳祐四年甲辰跨元及明凡三國十三帝而不肯仕改草之際兵燹數矣而竟無恙晚遭真主卒以顯榮夫豈偶然哉壽諱名也又頗類別號若私謚其裔孫金華守後叔與余善此像得之後叔之子廷棟

贊曰宋之遺黎元之逸民明之三老晚遭昌辰中罹兵燹孑然獨存不琢者天不利者身

高太史先生啟字季迪別號槎軒長洲人少明穎有縱橫才略而好為歌詩天藻秀發徃徃超宋元人乘而上之直接開元大厯而不能盡去劉白之習者小為才使耳元末張士誠竊吳自王而其上佐饒介之多羅致文學知名士為幕客而第其篇咏奉金帛為壽先生恒首冠然不肯臣士誠至高帝即位召修元史授翰林院編修史成特拜戶部侍郎先生以少不習握筭辭詔賚鑑金使歸需異日用先生歸教鄉里自給時魏觀自太常

卿奉璽書守郡賢先生而禮之欲徙郡治成乞先生文  
上梁而衛帥誣觀徙治為有異志先生亦逮至都論腰  
斬時年三十九天下惜先生才而悼其冤所著有金鳴  
集若干卷文集若干卷

贊曰明詩之昌如滙九江而公濫觴其追正始若康莊  
軌而公嚆矢辭冕離蟬翼以天全而竟死冤杳然丹青  
可滅者形不泯者名

工部郎張甘節先生者吳人名適甘節其別號也洪武

中以歌詩鴈行高子啟天子聞其才而辟之累遷工部  
郎中坐斥法謫遷廣州稅課大使卒先生貌白皙疎眉  
目其卒時且五十矣而像甚少

贊曰於乎先生歟音姿兮少與諸賢工書詩兮竄不  
稱困庶離菑兮客死無恨以完歸兮

俞都昌先生貞木初名楨後更名貞木字有立吳縣人  
既冠以學未成弗娶負笈受永嘉陳公麟易遂傍讀它  
經史為古文辭元季杜門隱居淡如也洪武初以薦者

起知韶之樂昌父喪歸服除補都昌後先有廉介聲再  
以母喪歸遂不仕老而郡守姚善禮之為脩賓主參幕  
中畫會坐株累有應天逮事白卒於郕建文之三年七  
月也得壽七十有一明年勤王事起太守善族而先生  
以家無恙

贊曰而貌之熙熙而鬚之離離而巾車之委蛇版蕩兮  
以身完濕束兮良於官肥遯兮而嬰狴犴客死兮而不  
罹患天耶人耶若循環兮其不可端



王光庵先生賓初名國賓字仲光長洲人有異才於經史  
子集天官樂書兵家稗志靡所不該覽猶邃於醫而屬  
世鼎革刑闕用重先生意不樂之且母老乃自晦為清  
狂不娶不仕其貌故以寢又以藥黥面及肘股間髻髮  
短服行歌道傍故舊有訪之者輒箕踞捫虱不相酬對  
以益自廢晚而太守姚公善知之微服再三叩乃稍稍  
露其竒姚公大歎賞為具賓主成禮而去先生孝其母  
年七十且死抱母不捨呼孃孃者數而後絕既絕之後

一日其家聞杖履聲則先生哭曰天乎奈何令我舍孀  
孀去乎久之哭始已先生所著有光庵集吳中名賢紀  
吳下古蹟詩

贊曰萬邦帝臣兮噫疇不利賓兮噫國之遺民兮噫母  
之遺身兮噫卒以泯泯兮噫

王按察先生英者崑山人也高帝為監察御史以懇勤  
職事當上意嘗手書敦厚王英賜之又標於殿柱累  
遷陝西按察使以疾乞休歸先生位三品而鄉居恂恂

若無官者嘗孑行至河岸而輕薄子值而偶觸之遂擠先生於水先生振衣起至家家人怪問之曰吾偶失足耳竟不言其事

贊曰古有劉寬厥名稱之亦有婁公至德可師公位小讓而於德齊編鬚嬰鱗率以身歸長者哉噫

黃給事先生鉞字叔揚常熟人舉鄉試嘗為某縣典史後舉會試以進士高第授戶科給事中建文之末出募兵於海上聞京師不守自投於琴川之橋下死妻子從之

贊曰事固不可論以建文之亡而士大夫爭先而為故  
主死者若饑之食而暍之就涼豈所謂殺身成仁志士  
之分而手足腹心亦施報之常烈烈叔揚其沒者固頽  
然而付清波而其不沒者尚凜然而傲秋霜也耶

姚恭靖公廣孝長洲人初為僧名道衍字斯道博綜釋  
典能為詩公雖以方外名而內勁俠有道士席應真者  
精兵家言與公鄰寓奇公而密授之顧益自晦秘人少  
識者獨吳人玉行異之曰是未遇時耳萬戶侯安足道

哉尋以高僧侍燕邸燕王之欲起兵其謀皆自公發之  
又嘗佐王治軍事佐庶子守北平從王下京師其策秘  
不傳也王既即大位思公功數欲爵之輒固辭僅為僧  
錄左善世三年立世子為皇太子妙簡僚佐公首為太  
子少師賜今名監修永樂大典出撫畿甸賑諸郡饑還  
奏輒稱旨上禮之呼為少師而不名公雖有賜第不居  
居蕭寺既病篤上親候之問何所言對曰業出家矣又  
何言卒年八十五贈榮國公賜祭塋上自為文紀其碑

比於元劉秉忠官其養子繼為尚寶少卿太子即位追  
思公功再加贈少師配享太廟嘉靖中停配享祀於大興  
隆寺公所著有詩文集若干卷道餘錄若干卷按王文  
恪公纂吾吳志謂公不娶卒不蓄髮而於他紀聞又云  
嘗見其像大興隆寺紅袍紗帽禿頂而肥今像乃永樂  
三年筆七十有三矣面皴瘦而白鬚飄然恐未真乃以  
意摹得之

贊曰劉誠意之事太祖與姚榮公之佐太宗俱筴帷帳

勒鼎鐘顧所以報誠意廼不若榮公之豐至傳榮公者  
寥寥焉豈身諱之而不自明抑史諱之而不有其庸嗟  
乎首發殺機睚眦就功不娶亡子蹈迷復凶所謂歸儒  
者不盡而為墨者不終耶

許少宰斯溫字叔雍吳縣人為邑諸生久次膺貢入太  
學詔選太學生當授官者公名為第一擢署刑部郎曹  
事遷監察御史出為廣東揭陽知縣未上召仍守故官  
以薦擢北平按察副使時燕王起兵北平版行公領大

興縣事佐世子守城曹國公來攻城世子用公計却之  
王即大位驛召公拜吏部左侍郎賜白金百兩綵幣八  
有副世子為皇太子公兼左春坊左贊善時漢趙二邸  
相繼為窺伺而公東宮家也且有守城舊內忌之中公  
下獄庾死年僅四十三皇太子即位贈行在吏部尚書  
公有材畧尤長兵事死未悉究人俱惜之今像豐碩而  
有容威

贊曰文皇龍變從者雲蒸公翼撫監以完北平功名鼎



來若川之盈一躡而蹶夫豈人能天予之時乃嗇之齡  
嗟彼詩人誤譏青蠅

吳文恪公訥字敏德別號思菴常熟人公生失恃弱冠  
白父寃且雪而以喪歸苦節礪行益究心理性之學發  
為文章有根柢以崑山令薦至京時楊文貞公士奇輔  
東宮賢而稱之文皇召見於齋殿奏對稱旨白衣備顧  
問洪熙初用學士度薦授監察御史出按浙江起拜南  
京都察院右僉都御史考滿遷左副都御史仍理院事

公先後所蒞皆臺職凜凜有風裁而不輕為操切以是  
獲正直忠厚稱年未滿七十乞致仕歸十有九年而卒  
得壽八十六所著有思菴前後續集小學解性理羣書  
補註陳北溪字訓晦菴詩文抄吳草廬文粹文章辨體  
詳刑要覽

贊曰吳公樹惇乃以文稱其所為文匪忝躬行一踐端  
公再履中丞無競無綫不孤不朋豈唯保身亦以完名  
陳直道公祚字永錫吳縣人永樂初登進士改翰林庶

吉士尋補方面公超為河南右參議與臬司爭事謫佃  
太和山宣宗初詔試諸謫佃者公為第一人拜監察御  
史彈射不避貴勢風裁大振出按福建還復按江西上  
書勸上讀大學衍義上怒甚謂此吾几案間物豎子將  
謂吾目不知耶而又怒所謂邪佞以奇巧蕩心語即械  
之并其家屬悉下獄且籍其家凡五年而英廟即位赦  
復其官出按湖廣益自勵風力尋露章劾遼王不法復  
逮下獄論死久之遼逆節露詔出公死改南京公論事

益切滿九載出僉福建按察事福建故悉公墨吏望風  
解印綬去以年且七十乞休卒得壽七十五公之卒也  
天下毋問識不識皆推其直故稱為直道陳公今像幅  
巾深衣且老矣而秀挺之色宛然鬚眉間故非凡流人  
也

贊曰公氣如金百鍊愈剛公心若江萬折必東公直則  
矢遇堅必洞前有伏機徃徃反中死我者人不死者天  
天實錫之七十五年

劉文恭公鉉字宗器長洲人別號假菴公少有至性母疾割股啖之且籲天請代竟不愈哀毀幾殆以善書薦入翰林明年中鄉試遂授中書舍人公雖以書薦而博學能文章其自居闇如也預修兩朝實錄成遷兵部主事仍供事內庭復預修宣廟實錄成進翰林侍讀特命教習庶吉士進侍講學士時同鄉楊侍郎翥以潛邸入見上館於公嘗從容薦公可大用上然之有泄於公者公自恨曰是必楊先生館於我而累我如是乃陽為室

煬以謝楊使它徙尋充經筵日講官轉國子祭酒條教  
篤密有李安成風時景皇帝迫大計欲易儲諸公卿從  
史之將上疏公獨辭不與丁繼母憂歸詔奪情復固辭  
不赴服除復職睿皇帝既反正閔公卿疏獨公無姓名  
而心善之會選青宮寮即擢詹事府少詹事俾侍講讀  
忽暴病卒年六十五贈禮部左侍郎公於修詞艱法取  
雅潔每篇成必旬日而後出之有假菴稿

賛曰公於文辭以簡而工其於登朝以退而庸衆目之

恬帝謂為忠天嗇其年而豐其宗子孫芄芄鬱作棟隆  
盛先生寅字啟東吳江人少從王賓先生學醫盡得其  
術永樂中治中貴人蠱竒驗聞於上召對稱旨授太醫  
院御醫東宮良娣娠而過期命先生診之曰此血疾也  
以娠治不治東宮恚而曰寅肉足食乎乃欲敗我子上  
為用先生藥而繫先生以俟明日疾大已乃赦先生賜  
金幣直數千緡宣宗朝先生尤重以御醫掌院事上嘗  
幸內直房而先生與同官奕弗及屏上命之終局且授

韻俾賦奕詩明日上倚和馬以老乞休周文襄公故善先生而餉賦餘米百石先生却之貽以詩有魚龍江海夢雀鼠稊梁謀語文襄終身愧之以高壽終今像渥而秀眉目美鬚髯一士流貴人也子孫多至大官而業醫者尤顯名

贊曰執而飾文居下而近君秩卑而行頗尊宜乎其後之多聞

陳僖敏公鑑字有戒號介菴吳縣人舉進士授監察御



史滿九載遷湖廣按察副使以母憂歸服除補山東副使未上復以父憂歸服除時方有三殿工命公補浙江而督木魯家務超拜都察院右副都御史鎮守陝西提督寧夏延綏邊兵脩公風神整峻美鬚髯人望而畏之顧其中寬然長者豁達有大度不為一切苛辨其居官所至有聲績而於關中尤著凡三載還朝亡何復詔公往又三載還佐院事不踰歲公復往且許便宜行事又三載而進右都御史詔與靖遠伯王驥更迭治軍驥老

將顧推稱公正德末始召還掌院事上親北征留公居  
守六師震驚敵乘勢入犯公以左都御史按行通州以  
南護邊人避敵始公以長厚得陝吏士心每行部下車  
則澍兩立降人有疾病誓為公擔肩子輒愈公出則老  
稚婦女爭前嘯呼願得一擔公笑弗却也至是陝大饑  
其卒數萬人上書願得公為帥詔公間往且賑之竣事  
還賜玉帶金幣羊酒會易儲加太子太保時同理院者  
王公文後公而氣陵公出其上公如弗聞也者會得末

疾乃乞休命馳驛歸又三年而卒贈少保謚僖敏今像  
奕奕如有神蓋公卒而陝郡邑爭廟而祀之若肝鑾者  
贊曰髯而偉盼其尊若神敏而寬中易知有親靖遠前  
驅東鹿後臻大電嚴霜誰適陽春帝緩西憂公在三秦  
俞士悅字仕朝長洲人舉進士為監察御史遷湖廣按  
察副使再遷浙江右參政公長身鐵面聲如鐘人望而  
畏之所至發擿奸伏有神明稱遷河南右布政使未上  
召為大理寺卿敵入寇京師進右都御史佐都督衛穎

營德勝安定二門敵退遷刑部尚書以易東宮加太子  
太保公之為刑部則斤斤三尺人稍有怨者南城返正下  
公獄謫戍鐵嶺衛赦還復原官卒年八十今像乃朝衣  
冠而色加厲鬚強半白

贊曰崑崙俞公強直自遂醜斤斷鵬鶚秋鷺滅火呼  
霖天迴鬼悸鐵嶺匪遥青宮寧貴我瞻遺肖悚焉思畏  
夏太常公景字仲昭崑山之清河里人初從母他適冒  
朱姓其名景舉進士始復為夏改翰林庶吉士公為庶

吉士獨以工楷法得幸文皇帝一日謂曰曩而來夫日  
乃可傍晚乎其更置之上遂改為曩俾侍東宮於南都  
得預密務尋驛召命書宮殿榜授中書舍人東宮即位  
入直文淵閣秩滿進考功主事加五品俸久之以薦出  
知瑞州府凡五歲入覲留為太常少卿進太常卿用年  
至乞致仕歸公前後仕宦逾四十年終始職文翰不能  
大有所見其歸也頗以詩酒自娛適跌宕山水間所畫  
竹石爭寶重之卒年八十三賜祭及葬今像美少而冠

僅二梁當是中書舍人或庶士寫

贊曰成進士舉而書其職三品京朝而終老于翰墨世  
所賞者不以文而以竹石不戚乎其志而優然以自適  
一壑一丘藹乎風流其東方先生之儔而差達于鄭台  
州者耶

禮部主客司主事永樂吳公凱字相虞崑山人也美風  
儀器局整峻為諸生以善書預修永樂大典書成賜金  
幣歸膺貢入太學舉鄉薦久之授刑部廣東司主事改

行在廣東司主事兩職皆劇曹明理持法為時所稱告  
歸省母還改禮部主客司竟以母老乞侍養優游林下  
者四十年年八十五而卒故大司寇劉廣衡少保冠深  
曹舊僚也太宰李秉曹後進也咸以公輔期之而不偶  
甚惜之寄問重疊公一不荅今像似中年筆

贊曰宦不必達以完其名既富且壽而保康寧有子顯  
庸孫枝繩繩取之獨嗇予之自贏

杜東原先生璫字用嘉吳縣人少孤從陳嗣初翰林學

諸雋先生為人敦茂長者嘗割股愈母疾而秘之故武功伯徐有貞為作東原生傳卒年七十九諸生會莖者千餘人私謚之曰淵孝先生今像豐美而秀眉目和色藹然襲人蓋中年所貌也

贊曰孝而自秘之不欲示獨行也文而以隱終不欲與時競也其貌溫如中則勁也吁嗟先生用德勝也

徐天全公有貞初名理字元玉已改今名舉進士改翰



林庶吉士章皇帝親御文華殿試其文擢為第一立授  
編修久之進侍講公於書少所不窺能詩歌善行草得  
長沙素師米襄陽風然不為一切無用學凡天官地理  
兵法刑名水利種種精究已已敵兵大入公以侍講行  
監察御史募兵河南還進右諭德河決沙灣拜左僉都  
御史往治之河工成擢左副都御史佐院事尋與中貴  
人吉祥武清侯石亨迎太上皇於南城復辟進兵部尚  
書翰林學士入內閣參預機務論功封奉天翊衛推誠

宣力守正文臣特進光祿大夫柱國武功伯兼華蓋殿  
大學士公念吉祥亨橫甚謀制之為所中謫廣東參政  
逮下詔獄且論死釋編氓金齒赦歸吉祥亨敗始復冠  
帶自便凡十餘年而卒年六十六吳學士為狀稱公短  
小精悍目光射人今像且老矣而冠貂蟬服侯服故不  
能釋然也

贊曰赫赫武功天質胡異職司藝文廼慕經濟萬象肅  
括九河康乂功成倏忽皇輿奠位辱以榮伏毀跡名致

瑕瑜十載矛盾一世

祝大中公顥字惟清長洲人為諸生不欲赴鄉試久之  
為有司所強乃一試而薦又不肯赴省試其又明年有  
司復強之復一試而第授行在刑科給事中出為山西  
右參議進其省右參政公歷官僅三政垂三十年所至  
能舉職而其在山西興學校表先賢白冤獄它善政不  
可指數甫六十致仕歸與徐武功劉完菴諸先生為詩  
酒社公年最長而最後死春秋七十有九吳文定公誌

及其同年四人入內館出詩目而試之問其故曰上知  
若等名姑為一詩欲使勅習中貴人書也公不應竟出  
為給事而以内艱歸土木之難起景皇帝詔奪情以都  
御史起復復不應迨服除遂巡守故官起復事史不載  
而文定公長者為史官當不妄

贊曰諸生不試難於出內館不詩難於屈中丞不就難  
於奪十年不遷難於悅六十棄官易於退居約不厭易

於食是惟四難復二易以此歸來獲長世公能致命復  
遂志

張篠庵先生和者崑山人字節之生而警穎卓朗善屬  
文嘗病目而夜篝燈讀書不休遂以其一廢與其弟穆  
俱應南宮試而自念必上第而穆於文小劣遂易卷以  
入曰吾可遲而得也已穆舉第二人而先生亦次二十  
七既廷試執政者奇其策而欲首之詎知其一目也抑  
之二甲第一和遂謝病歸以修國史召補闕部主事遷

郎中遂為浙江提學副使所校士毋論多寡即第甲乙  
工者前辨質先生句摘其紙而後斥之人大駭服尋移  
病歸卒年僅四十九其為詩文皆雅健有法諸子孫多  
顯者穆亦至參政

贊曰鳴惟先生雋朗超羣文亦稱是其氣遏雲為弟易  
草觀過知仁穆亦繼之為時文人敦睦之風後裔弗淪  
鄭介菴先生文康字時又崑山人頎而偉軀意豁如也  
舉進士自以不能俯仰流俗屬微恙即乞告歸以此終

其身先生居恒杜門蹢躅少公府跡於書無所不窺而尤善經生義所指授多顯者雖用隱約成好至於表忠烈稱勲伐未嘗不慷慨有深味也故葉文莊公盛仕通顯而時時推先生以為不可及今像殊魁然非山澤癯也所著有平橋稿若干卷

贊曰一命未膺飄然里居升斗未沾耕而讀書歿無易名生不辟除以擬靖節人或謂隘吾不知其他其藻弗如

葉文莊公盛字與中崑山人舉進士為兵科給事中進都給事中時英廟北狩陷敵敵大入犯京兆而東西南夷並起公䟽不時上所建畫及彈事皆精當當是時于公稱真司馬而公為真夕垣于公社稷臣公寶亞之出為山西右參政協贊獨石諸軍事時入城俱創敵僅餘一毀垣公至則皆鼎新之蒐卒乘課屯種除戎器遂漸以富强號雄鎮焉英宗即位驛召至京面慰諭久之擢右僉都御史撫兩廣者七年所斬獲叛蠻以數萬計用



議事入京遷左僉都御史撫宣府宣府公故所參政地  
益大課屯田收其羨易戰馬至千八百匹增築堡七百  
餘入為禮部右侍郎改吏部遷左侍郎佐其長以公明  
嘗一賑畿甸荒議闕西邊事謂河套未易搜東勝未易  
復因條上增兵守險數事蓋至於今有味焉人主方嚮  
用之俄暴病卒年五十五公有文武才好讀書博洽章  
故所至有聲實而其撫兩廣也稍損于宣府獨石時今像  
豐哲而有英氣稱其為人

贊曰爰爰己巳實隲王綱公長夕垣出甸朔方內則著  
龜外則金湯股肱惟臣膺力方剛天實招之爰逝我梁  
惜哉壯猷不逮孝皇

弇州續稿卷一百四十六

欽定四庫全書

弇州續稿卷一百四十七

明 王世貞 撰

文部

像贊

韓襄毅公雍字永熙長洲人弱冠舉進士明年授監察御史行治河以強幹稱按江西威名益大振墨吏望風解印綬去以計平吉虔寇故相陳循良之甫移廣東按

察副使即薦為右僉都御史再撫江西循得罪戍公坐  
左遷山西按察副使俄入少卿大理復為都御史佐臺  
事能以從容劑臺長之暴伉者治宣府軍政未幾以左  
僉都御史同都督輔等率師十五萬討廣寇公分兵擣  
其窟蕩平之前後俘馘四萬一千七十人斬大藤峽置  
嶂戍控禦捷聞進左副都御史以憂歸起家右都御史  
總督兩廣軍務主副將官三司悉聽節制仍許便宜從  
事久之與中貴人不平為所訐詔釋不問公乃乞致仕

公歸而南北慰薦亡慮數十章皆不報則猶以中貴人故也卒年五十七廣人肖而土木之以為神今像偉然紫色而小鬚

贊曰卓卓韓侯淮陰同銳上谷雲蒸洪都風厲乃睽南顧受脤斯寄遭險必闢靡堅不脆火燎膏藤霜驅瘴癘功成謗興含用長逝

劉完菴先生珏字廷美長洲人少遇况守鍾推擇為吏先生謝不願吏願得補諸生守許之舉應天鄉試補太

學生以材舉授刑部主事遷山西按察僉事提督屯田  
任職亡害甫五十乞致仕歸以壽終先生孝友恭謹與  
人居無失色顧操履絕介特人亦不調色干之及有所  
賅動也老而嗜學不衰為詩尤長七言清麗可詠書正  
行出趙吳興畫山水出王叔明皆逼真世甚珍之所著  
完庵集若干卷今像色青黑於鐵稜稜如不可犯者  
贊曰未老而歸以署其庵吾知其完老而大歸用以蓋  
棺吾不知其完雖然不人之干人亦不我干庶幾其完

劉樓園公昌字欽謨吳縣人生而穎敏讀書過目輒誦  
工屬文十九舉鄉試第一明年會試第二人廷試高等  
以疾予告久之授南京工部主事召修宋元史遷員外  
郎郎中出為河南按察副使提調學校滿九載始擢廣  
東左參政又五歲以母憂歸明年復丁父憂服除疾不  
能起以卒年五十歲公以詩名振郎署間翰林先生見  
而畏之其蒞河南所斥削不少借以是中忌者偃蹇不  
得推遷其中亦不能無少望所著有胥臺鳳臺金臺嵩

臺越臺凡五稿若干卷懸笥瑣探三卷中州文表若干  
卷他未成書十餘種

贊曰公之文采五色渥洼著書窮年冀成大家雖則成  
家猶未離駒世無伯樂老而鹽車以此自悲若賈長沙  
蓬累可也得毋過乎

魚公侃字

闕

常熟人也舉進士為部曹郎以能治劇

遷河南開封府知府開封居會省而所領三十六州邑  
最號繁劇且俗羯獫不易治而公一切以惠文彈治之



於上官無所阿私苞苴避匿不敢進旦夕所進惟脫粟  
鮑魚菰菜而已滿考稱疾歸公歸家益貧妻子不免饑  
寒而節操益勵臺使者有所餽遺不受既病久困牀褥  
妾以一甌粥啖之輒呼曰廉官何不食肉糜竟死不能  
具寔窆時同邑有錢昕者至布政使亦廉而故有父產  
時人為語曰富不愛錢錢昕貧不愛錢魚侃

贊曰魚之為物以骨鯁稱公乃姓之衛史以名凡二千  
年有光其聲尚湖汪洋虞山崢嶸公骨已朽公神猶生

故福建右參政陸公諱景泰字孟昭吾郡之常熟人也而居太倉之衛城登景泰辛未進士授刑部主事歷員外郎郎中能以文學飾吏治於法比井井矣而性仁慈時有所寬貸其視獄日多蓄貓於獄以辟鼠害囚之重繫者得無傷死兩按河南山西大獄俱以明允稱旨藉藉有公卿間聲矣而僅以久次轉今官至則首捕舶商之行剽於海者僂之繕理戍城及甲仗一新又築漳泉二郡海隄海不能侵郭閩人服其威惠竟中蜚語罷歸以疾

卒年六十公為人磊落慷慨與人交有終始居恒謂人生寄也即家亦寄安能有所別擇而碌碌為子孫作巢穴故不謀生產而所至即官舍或僦居必小飾齋室蒔花竹時戒內子儲名醞甘果玆錯以待不時之需客過必留留則咄嗟立辦至卜夜而猶未已其遇元夕張燈合樂帳飲雖侯家不過也以故三事而降至同舍諸曹靡不願交陸比部云公所為得公卿間聲者以此而毀亦隨之率用此失官雖然後之稱俠有度者必歸公也

曾孫瑚仕為御史至知府亦有公風

贊曰達將王孫不顯已使同孟公不踰軌安得其人與終始

孔公鏞字韶文長洲人也宣聖五十代孫舉進士知都昌縣以姻連寧藩故改連山先後有惠政遂試知高州府久之即為真公以計諭降大盜酋又數數破他劇賊論功遷廣東按察副使就填其地公所剪刈大小以數十百計威名遂益振其後為廣西按察使臺檄公討荔

浦賊賊望公幟駭曰是故高州孔副使耶知有走耳遂  
一鼓平之進食二品俸遷左布政使甫上事擢右副都  
御史撫貴州清平有苗阿刺者以黠悍善筭莫而挾其  
子溪能敵百夫父子豪長溪洞間二十餘年數傷殺官  
軍無如之何公刺得其厚善者清平指揮授之策而誘  
縛之入為工部右侍郎舟至富陽暴卒年六十三賜祭  
及塋祝允明謂公之卒白氣自舟尾上直貫天表蓋日  
正中也而熒熒然星矣允明遂目之為孔鏞星

贊曰我戰則克聞之先師公苗裔耶厥用迺宜干櫓禮  
義韜幹書詩際地環天牂牁羅施孱者懷德黜惕其威  
歿而一星燦如其箕請招巫陽試為問之

章公格字韶鳳別號戒庵常熟人父孟端為御史有聲  
公舉進士授南京工部主事遷刑部郎中擢廣東按察  
副使歷雲南按察使福建左布政使入為南京光祿寺  
卿轉大理卿致仕公所至能舉職而不為表暴以希赫  
赫聲歸田垂二十年熙怡鄉里間亡忤言教色兄弟助

教儀參議表中丞律與公皆通顯而公獨稱長者公壽八十今像豐頤而長偉然福德君子也

贊曰仕而顯融歸而壽康行無汙隆口絕否臧立長者朝居長者鄉而推長者萬石東陽積厚茲深是以流長章容齋公律字鳴鳳大理卿格之弟也後大理一舉成進士授刑部山東司主事遷江西員外郎明法理訊獄亡害擢保定知府保定最為雄劇郡多豪不易理而公處之斤割理解遂以吏治聲表三輔初其父御史公忤

其臺長見黜而是時當公所治其長故已殆而家籍勢猶橫會坐事人謂公且甘心焉公歎指其坐曰此三尺地也而吾敢修先人之怨卒從正法公以課高遷雲南右參政父喪歸服除改廣西左參遂為其右布政使嘗督兵平荔浦獞加正二品俸轉貴州左布政使遂進右副都御史撫雲南公所至有方面勲然大要不能踰於守而其在雲南也與巡按御史不相善會其人以考察斥而公遷南京左副都御史理院事遂具疏許公受夷



浦賊賊望公幟駭曰是故高州孔副使耶知有走耳遂  
一鼓平之進食二品俸遷左布政使甫上事擢右副都  
御史撫貴州清平有苗阿刺者以黠悍善筭莫而挾其  
子溪能敵百夫父子豪長溪洞間二十餘年數傷殺官  
軍無如之何公刺得其厚善者清平指揮授之策而誘  
縛之入為工部右侍郎舟至富陽暴卒年六十三賜祭  
及塋祝允明謂公之卒白氣自舟尾上直貫天表蓋日  
正中也而熒熒然星矣允明遂目之為孔鏞星

贊曰我戰則克聞之先師公苗裔耶厥用迺宜干櫓禮  
義韜幹書詩際地環天牂牁羅施孱者懷德黜惕其威  
歿而一星燦如其箕請招巫陽試為問之

章公格字韶鳳別號戒庵常熟人父孟端為御史有聲  
公舉進士授南京工部主事遷刑部郎中擢廣東按察  
副使歷雲南按察使福建左布政使入為南京光祿寺  
卿轉大理卿致仕公所至能舉職而不為表暴以希赫  
赫聲歸田垂二十年熙怡鄉里間亡忤言教色兄弟助

教儀參議表中丞律與公皆通顯而公獨稱長者公壽八十今像豐頤而長偉然福德君子也

贊曰仕而顯融歸而壽康行無汙隆口絕否臧立長者朝居長者鄉而推長者萬石東陽積厚茲深是以流長章容齋公律字鳴鳳大理卿格之弟也後大理一舉成進士授刑部山東司主事遷江西員外郎明法理訊獄亡害擢保定知府保定最為雄劇郡多豪不易理而公處之斤割理解遂以吏治聲表三輔初其父御史公忤

其臺長見黜而是時當公所治其長故已殆而家籍勢猶橫會坐事人謂公且甘心焉公歎指其坐曰此三尺地也而吾敢修先人之怨卒從正法公以課高遷雲南右參政父喪歸服除改廣西左參遂為其右布政使嘗督兵平荔浦獞加正二品俸轉貴州左布政使遂進右副都御史撫雲南公所至有方面勲然大要不能踰於守而其在雲南也與巡按御史不相善會其人以考察斥而公遷南京左副都御史理院事遂具疏許公受夷

賄俱檻致廷尉按驗不盡實御史謫佃塞外而公得冠  
帶間住自是鬱鬱不樂屬疾卒年六十六今像亦雄整  
與大理公頡頏

贊曰公才卓犖饒股肱郡所惟伸法罔展和溫六韶披  
炎百蠻委責拂衣明農毋損厥問

李文安公傑字世賢別號石城常熟人十七舉鄉薦凡  
三試而登進士上第改翰林庶吉士授編修進侍講滿  
考遷侍讀學士以春宮恩進兼左春坊左庶子徙為南

京國子祭酒加祿俸以憂歸服除改太常少卿兼侍讀  
學士遂遷南京禮部右侍郎入為本部左侍郎進南京  
吏部尚書改禮部以事忤劉瑾致仕歸用老壽終贈太  
子太保公高簡雅自重不為骫骳以故在翰林最久號  
為淹滯而其任常伯也亦不能得中貴人驩迨逆瑾誅名  
為且用之實不召也今像髮鬚白矣而猶有矜嚴容  
贊曰簡簡文安國之老成淡以自藏矜而不爭虞山尚  
湖詩侶酒盟逍遙徜徉以退為榮我懷伊人亡愧易名

李太僕先生初名姓一名應熊字應禎後以字行更字  
貞伯長洲人舉鄉試不第入太學中貴人慕先生名而  
言之祭酒欲以為弟子師先生弗往用善書選中書舍  
人入直文華殿詔諸舍人書佛經乃上疏言凡為天下  
國家有九經不聞佛經也上恚杖而釋之尋罷殿直遷  
南京兵部武選員外郎以憂歸服除補車駕尋遷職方  
郎中轉南京尚寶卿久之進太僕少卿乞致仕歸卒年  
六十三賜葬如例先生剛介慕立奇節所至與人爭辨

引經證典莫能難也博學能詩善法書顧耻以是見名  
晚節益卞急不能容以故多畏而避之今像鬚眉鬱然  
而有不可犯之色

贊曰侃侃太僕清彊以果遇觸必達達所不可抗論丹  
宸奪色青瑣衆謂僚窠視若么麼慨焉拂衣却軌避時  
見而肅然退無遺思遭世坦迤乃獲完歸

陸太常公鉞字鼎儀崑山人其先冒吳姓會試第一人  
廷試第二人始奏仍陸姓授翰林編修預修英廟實錄



賄俱檻致廷尉按驗不盡實御史謫佃塞外而公得冠  
帶間住自是鬱鬱不樂屬疾卒年六十六今像亦雄整  
與大理公頡頏

贊曰公才卓犖饒股肱郡所惟伸法罔展和溫六韶披  
炎百蠻委責拂衣明農毋損厥問

李文安公傑字世賢別號石城常熟人十七舉鄉薦凡  
三試而登進士上第改翰林庶吉士授編修進侍講滿  
考遷侍讀學士以春宮恩進兼左春坊左庶子徙為南

京國子祭酒加祿俸以憂歸服除改太常少卿兼侍讀  
學士遂遷南京禮部右侍郎入為本部左侍郎進南京  
吏部尚書改禮部以事忤劉瑾致仕歸用老壽終贈太  
子太保公高簡雅自重不為骫骳以故在翰林最久號  
為淹滯而其任常伯也亦不能得中貴人驩迨逆瑾誅名  
為且用之實不召也今像髮鬢白矣而猶有矜嚴容  
贊曰簡簡文安國之老成淡以自藏矜而不爭虞山尚  
湖詩侶酒盟逍遙徜徉以退為榮我懷伊人亡愧易名

李太僕先生初名姓一名應熊字應禎後以字行更字  
貞伯長洲人舉鄉試不第入太學中貴人慕先生名而  
言之祭酒欲以為弟子師先生弗往用善書選中書舍  
人入直文華殿詔諸舍人書佛經乃上疏言凡為天下  
國家有九經不聞佛經也上恚杖而釋之尋罷殿直遷  
南京兵部武選員外郎以憂歸服除補車駕尋遷職方  
郎中轉南京尚寶卿久之進太僕少卿乞致仕歸卒年  
六十三賜葬如例先生剛介慕立奇節所至與人爭辨

引經證典莫能難也博學能詩善法書顧耻以是見名  
晚節益卞急不能容以故多畏而避之今像鬚眉鬱然  
而有不可犯之色

贊曰侃侃太僕清彊以果遇觸必達達所不可抗論丹  
宸奪色青瑣衆謂僚窠視若么麼慨焉拂衣却軌避時  
見而肅然退無遺思遭世坦迤乃獲完歸

陸太常公鉞字鼎儀崑山人其先冒吳姓會試第一人  
廷試第二人始奏仍陸姓授翰林編修預修英廟實錄

成遷修撰侍皇太子講讀公貌清麗善為容止當進講  
皇太子目而亟稱之滿九載擢右春坊右諭德太子立  
是為孝宗進公太常少卿兼翰林侍讀充經筵日講官  
再賜白金文綺楮幣屬羸疾予告馳驛歸亡何卒訃聞  
賜祭及葬官一子為中書舍人公之在翰林以端謹清  
峭稱其為文簡勁有法而不喜為敷腴詩亦如之所著  
有春雨堂集若干卷有張泰亨父者與公同里同年同  
館而蚤死其詩實勝之公今像乃少年時筆也

贊曰公昔登庸直憲飛龍倡彼介鱗以時景從儲之玉堂儲之青宮台鉉步武而忍告終悲夫悲夫公之弗辰孝德方隆

吳文定公寬字原博學者稱為匏菴先生公補諸生久次膺貢入太學鄉試第三人舉會試廷試皆第一授翰林修撰遷右諭德為左春坊左庶子擢少詹事兼侍讀學士進吏部右侍郎轉左侍郎以左侍郎兼學士掌詹事府直東閣司誥敕久之進禮部尚書餘若故卒年七

十贈太子太保公宏亮粹夷為文章務典雅不事詭僻  
書法眉山能起雅去俗在翰林餘三十年前後主會試  
及分典者各再纂實錄及會典者三於國家大典制攷  
據詳核衆無敢先之者公望鬱跂乃見阻忌人公澹然  
弗屑也今像似中年筆疎眉目豐下而長美髯脩脩望  
而知其鉅公長者

贊曰弘治諸賢鬱為昌朝而公其時鶴禁元僚匪澄而  
清不矯以翹大義昌言若空中標退而澹然怡神寂寥

國悲慙遺世惜屯膏夫惟弗庸是以獨超

陸式齋公容字文量崑山人舉進士授南京工部主事外  
艱服除改兵部職方主事遷武庫員外郎進職方郎中  
內艱服除改武選擢浙江右參政以大計罷明年卒年  
五十九君白晢豐下秀眉目博學能文章有經世志其  
郎兵部時最為其長所委信封事條上日數千言皆以  
屬公西域胡進獅至秦峪關乞遣大臣逆之安南數與  
占城閩議發兵至討公俱力言之而寢公又言錦衣百



成遷修撰侍皇太子講讀公貌清麗善為容止當進講  
皇太子目而亟稱之滿九載擢右春坊右諭德太子立  
是為孝宗進公太常少卿兼翰林侍讀充經筵日講官  
再賜白金文綺楮幣屬羸疾予告馳驛歸亡何卒訃聞  
賜祭及葬官一子為中書舍人公之在翰林以端謹清  
峭稱其為文簡勁有法而不喜為敷腴詩亦如之所著  
有春雨堂集若干卷有張泰亨父者與公同里同年同  
館而蚤死其詩實勝之公今像乃少年時筆也

贊曰公昔登庸直憲飛龍倡彼介鱗以時景從儲之王  
堂儲之青宮台鉉步武而恐告終悲夫悲夫公之弗辰  
孝德方隆

吳文定公寬字原博學者稱為匏菴先生公補諸生久  
次膺貢入太學鄉試第三人舉會試廷試皆第一授翰  
林修撰遷右諭德為左春坊左庶子擢少詹事兼侍讀  
學士進吏部右侍郎轉左侍郎以左侍郎兼學士掌詹  
事府直東閣司誥敕久之進禮部尚書餘若故卒年七

十贈太子太保公宏亮粹夷為文章務典雅不事詭僻  
書法眉山能起雅去俗在翰林餘三十年前後主會試  
及分典者各再纂實錄及會典者三於國家大典制攷  
據詳核衆無敢先之者公望鬱跂乃見阻忌人公澹然  
弗屑也今像似中年筆疎眉目豐下而長美髯脩脩望  
而知其鉅公長者

贊曰弘治諸賢鬱為昌朝而公其時鶴禁元僚匪澄而  
清不矯以翹大義昌言若空中標退而澹然怡神寂寥

國悲慙遺世惜屯膏夫惟弗庸是以獨起

陸式齋公容字丈量崑山人舉進士授南京工部主事外  
艱服除改兵部職方主事遷武庫員外郎進職方郎中  
內艱服除改武選擢浙江右參政以大計罷明年卒年  
五十九君白皙豐下秀眉目博學能文章有經世志其  
郎兵部時最為其長所委信封事條上日數千言皆以  
屬公西域胡進獅至秦峪關乞遣大臣逆之安南數與  
占城鬩議發兵至討公俱力言之而寢公又言錦衣百

戶韋瑛誣害良民十餘人當誅中貴人所舉金齒騰衝  
參將昌佐不當用又舉都督僉事王欽梁宏非有功不  
當除上為勉聽之而其所上封事若儲養台輔教導勲  
戚愛惜人才久任巡撫經理京衛選練禁兵均平鈔法  
慎重會議皆鑿鑿中利害即與他部事有所侵忤弗計  
也其治浙尤有神明稱而以失色一郡守為所挾開橐  
得吏賕金致謗免公既負材且晚遇意有所欲為而出  
不意免以是自恨屬疾竟不起所著有式齋稿浙藩稿

歸田稿式齋筆記封事錄太倉志水利集問官錄菽園  
襍記若干卷

贊曰淵淵陸公賦材實豐乃薄雕虫乃慕屠龍佐計樞  
廷數屢皂封其秩維卑厥猷則崇晚而旬宣忽以蹶終  
易簣之際中猶蘊隆

沈石田先生周字啓南長洲之相城人自號曰石田晚  
更號白石翁以處士卒年八十三先生博學無所不通  
喜為詩其源出白香山蘇眉州兼情事雜雅俗當所意

到訾亶不得休書法雙井矻矻未化至丹青之學久而天下愈寶之以為北苑巨然徐熙父子復出勝國諸賢勿論也先生生短小而哲眉目媚秀如畫今像則已老所謂見其杜德機者非耶

贊曰退兮若不勝澹兮若無求誦其詩以為白香山又若以為蘇眉州聽其談或小吏之黃衣跡其隱則釣父之羊裘其骨僅一丘而丹青被乎九州者耶

姜滄碧公昂字恒順太倉人生而端凝介特舉進士出

知棗強縣以最聞入為監察御史嘗上疏論劾方士李  
孜省得罪廷杖病起乃以親老乞改南出知河南府再  
以親老乞便郡不許疏上至三乞為郡僚或州邑博士  
吏部惜之為改寧波知府前後將九載請歸養者再復轉  
福建左參政抵家卧不起久之母壽終服闋吏部復以  
參政起公而公卒矣公所蒞官俱以廉能稱日取俸廩  
鬻少魚肉共母其與妻子則羹菜相對茹矣時衛帥尚  
貴盛而浮慕公伺公休沐羣羔鴈布幣踵門則公已從



戶韋瑛誣害良民十餘人當誅中貴人所舉金齒騰衝  
參將昌佐不當用又舉都督僉事王欽梁宏非有功不  
當除上為勉聽之而其所上封事若儲養台輔教導勲  
戚愛惜人才久任巡撫經理京衛選練禁兵均平鈔法  
慎重會議皆鑿鑿中利害即與他部事有所侵忤弗計  
也其治浙尤有神明稱而以失色一郡守為所挾開橐  
得吏賕金致謗免公既負材且晚遇意有所欲為而出  
不意免以是自恨屬疾竟不起所著有式齋稿浙藩稿

歸田稿式齋筆記封事錄太倉志水利集問官錄菽園  
襍記若干卷

贊曰淵淵陸公賦材實豐乃薄雕虫乃慕屠龍佐計樞  
廷數屢皂封其秩維卑厥猷則崇晚而旬宣忽以蹶終  
易簣之際中猶蘊隆

沈石田先生周字啓南長洲之相城人自號曰石田晚  
更號白石翁以處士卒年八十三先生博學無所不通  
喜為詩其源出白香山蘇眉州兼情事雜雅俗當所意

到訾亶不得休書法雙井矻矻未化至丹青之學久而  
天下愈寶之以為北苑巨然徐熙父子復出勝國諸賢  
勿論也先生生短小而哲眉目媚秀如畫今像則已老  
所謂見其杜德機者非耶

贊曰退兮若不勝澹兮若無求誦其詩以為白香山又  
若以為蘇眉州聽其談或小吏之黃衣跡其隱則釣父  
之羊裘其骨僅一丘而丹青被乎九州者耶

姜滄碧公昂字恒順太倉人生而端凝介特舉進士出

知棗強縣以最聞入為監察御史嘗上疏論劾方士李  
孜省得罪廷杖病起乃以親老乞改南出知河南府再  
以親老乞便郡不許疏上至三乞為郡僚或州邑博士  
吏部惜之為改寧波知府前後將九載請歸養者再復轉  
福建左參政抵家卧不起久之母壽終服闋吏部復以  
參政起公而公卒矣公所蒞官俱以廉能稱日取俸廩  
鬻少魚肉共母其與妻子則羹菜相對茹矣時衛帥尚  
貴盛而浮慕公伺公休沐羣羔鴈布幣踵門則公已從

間道易服出矣其不苟取老而彌篤即貴勢有力毋敢  
通關節者有子曰龍負文武才居官饒聲實而懼讒口  
以歸後頗不能自檢於聲色云

贊曰其持已也庶其養民也惠以此循守令夫復何愧  
其事上也方其攝下也肅以此名御史夫復何慙少而  
窳然老而蕭然以此稱鄉先生夫復何言

吳遜菴公愈字惟謙冰蘖先生凱之子也少而穎敏強  
記既成進士授南京刑部廣東司主事久之遷員外郎

郎中進四川叙州知府凡十二年始擢河南右參政明年致仕居林下者二十五年而卒年八十四僅少于冰蘖公一歲耳其在留曹能持法與中貴人忤老成慎練為其長所器重薦之藩臬不果而得叙州叙為蜀饒郡然最西偏夷獠雜處公不鄙其人精心撫字結以恩信衆皆悅從馬湖守安鰲判故土酋也撫臣以大兵誅之公在行間參謀畫料敵若指掌時復用兵貴之都勻轉餉不乏然賞有及有不及公不以介意在郡九年課農桑興

學校戶口滋植風俗淳美為諸郡最而業已倦遊矣里  
居優游自奉養喜賓客和謹得後進心有女三人歸陸  
伸文徵明皆名士而歸王氏者有子同祖以才入中秘  
皆侍公周旋以是寬樂終其身

贊曰仕不九卿曰上大夫壽不九袞曰八十餘宅相所  
貽蘭蕤玉枝父子耆喆為鄉閭師

劉公纓字與清其先江西之清江人明興隸戎藉為蘇  
州衛人公為御史而有遺以古印章曰鐵柯者因自號

以見志生而磊珂奇特及長長身玉立眉目踈秀辭吐琅琅由進士兩令武陵滕邑俱最召拜河南道監察御史出按福建再按廣東所至有風裁而於廣東尤著還朝偕其寮疏論外戚中貴相結為不法忤旨得杖滿九載擢太僕少卿又三載以僉都御史撫四川久之哭子成疾歸有薦者復撫四川前後凡六載所綏懷得蕃落心而茂平賊功尤偉有金幣之賜尋以例裁革還朝改撫湖廣為大璫瑾所憎用蜀事下獄自理得釋仍故官



間道易服出矣其不苟取老而彌篤即貴勢有力毋敢  
通關節者有子曰龍負文武才居官饒聲實而懼讒口  
以歸後頗不能自檢於聲色云

贊曰其持已也廉其養民也惠以此循守令夫復何愧  
其事上也方其攝下也肅以此名御史夫復何慝少而  
嶷然老而蕭然以此稱鄉先生夫復何言

吳遜菴公愈字惟謙冰蘖先生凱之子也少而穎敏強  
記既成進士授南京刑部廣東司主事久之遷員外郎

郎中進四川叙州知府凡十二年始擢河南右參政明年致仕居林下者二十五年而卒年八十四僅少于冰蘖公一歲耳其在留曹能持法與中貴人忤老成慎練為其長所器重薦之藩臬不果而得叙州叙為蜀饒郡然最西偏夷獠雜處公不鄙其人精心撫字結以恩信衆皆悅從馬湖守安鰲判故土酋也撫臣以大兵誅之公在行間參謀畫料敵若指掌時復用兵貴之都勻轉餉不乏然賞有及有不及公不以介意在郡九年課農桑興

學校戶口滋植風俗淳美為諸郡最而業已倦遊矣里  
居優游自奉養喜賓客和謹得後進心有女三人歸陸  
伸文徵明皆名士而歸王氏者有子同祖以才入中秘  
皆侍公周旋以是寬樂終其身

贊曰仕不九卿曰上大夫壽不九袞曰八十餘宅相所  
貽蘭蕤玉枝父子者詰為鄉閭師

劉公纓字與清其先江西之清江人明興隸戎藉為蘇  
州衛人公為御史而有遺以古印章曰鐵柯者因自號

以見志生而磊珂奇特及長長身玉立眉目踈秀辭吐琅琅由進士兩令武陵滕邑俱最召拜河南道監察御史出按福建再按廣東所至有風裁而於廣東尤著還朝偕其寮疏論外戚中貴相結為不法忤旨得杖滿九載擢太僕少卿又三載以僉都御史撫四川久之哭子成疾歸有薦者復撫四川前後凡六載所綏懷得蕃落心而茂平賊功尤偉有金幣之賜尋以例裁革還朝改撫湖廣為大璫瑾所憎用蜀事下獄自理得釋仍故官

遷南京大理寺卿入為兵部右侍郎明年進南京刑部尚書凡三上乃得請恩禮周浹居十餘歲值世廟即位賜羊酒存問乃卒壽八十二祭葬如制公所至有紀述獨不能盡得鄉曲聲

贊曰彊直自遂宦以有聲雖歷臚仕而無速成老而賜歸桑梓餘榮齟齬鄉曲遂稽易名

陳成齋公瑀字玉汝長洲人舉進士改翰林庶吉士授兵科給事中累遷刑科都給事中擢大理寺右寺丞轉

左進右少卿復轉左為南京左僉都御史進左副都御史前後俱佐臺事兼督操江諸軍以病乞休卒年六十  
七賜祭葬如例公始起諸生從吳文定公為古歌詩不屑程式義坐是久困塲屋間會試所射策以能悲僻事  
李文正公拔而寘前列公所居官皆天下雄劇職而自  
恨不獲用文史顯恒悒悒不樂李公志中蓋言之然其  
前後能勤勵不失官譽老成明練亦一時巨擘也

贊曰公起經術而顯法吏雖本緣飾乃心文事留臺彈

壓江介控制豈伊匪雄竟睽初志詩人有言不求不忤  
王文恪公鏊字濟之別號守溪學者稱之為震澤先生  
吳縣之洞庭人也十五而從父遊太學即以文重公卿  
間居九年應應天試第一明年會試復第一廷試得第  
三人及第時論猶謂執政抑之故授翰林編修滿考遷  
侍講修憲廟實錄成進右春坊右諭德公居翰林日杜  
門讀書為古文章使門者謝客勿通刺即一見之亦不  
輕報謝以是得簡貴聲而人愈慕之久之乃以薦拜侍

講學士經筵日講公每進講至天理人欲君子小人之互勝輒拳拳致詳上有所幸中貴人廣頗導遊西苑左右諫不聽公為講文王不敢畋遊章上罷講以謂廣曰講官所指殆若曹耶好為之自是游益省矣選東宮寮為少詹事兼學士遷吏部右侍郎所上籌邊八事多見採納會其父憂歸服除仍故職正德初九卿伏闕上疏請誅中貴人瑾等召至左順門使它中人詰所由諸九卿相懾唯唯獨公以危言繼尚書文後事幾濟而變瑾



遷南京大理寺卿入為兵部右侍郎明年進南京刑部尚書凡三上乃得請恩禮周浹居十餘歲值世廟即位賜羊酒存問乃卒壽八十二祭葬如制公所至有紀述獨不能盡得鄉曲聲

贊曰彊直自遂宦以有聲雖歷臚仕而無速成老而賜歸桑梓餘榮齟齬鄉曲遂稽易名

陳成齋公璠字玉汝長洲人舉進士改翰林庶吉士授兵科給事中累遷刑科都給事中擢大理寺右寺丞轉

左進右少卿復轉左為南京左僉都御史進左副都御史前後俱佐臺事兼督操江諸軍以病乞休卒年六十  
七賜祭葬如例公始起諸生從吳文定公為古歌詩不屑程式義坐是久困場屋間會試所射策以能悲僻事李文正公拔而寘前列公所居官皆天下雄劇職而自恨不獲用文史顯恒悒悒不樂李公志中蓋言之然其前後能勤勵不失官譽老成明練亦一時巨擘也

贊曰公起經術而顯法吏雖本緣飾乃心文事留臺彈

壓江介控制豈伊匪雄竟睽初志詩人有言不求不忤  
王文恪公鏊字濟之別號守溪學者稱之為震澤先生  
吳縣之洞庭人也十五而從父遊太學即以文重公卿  
間居九年應應天試第一明年會試復第一廷試得第  
三人及第時論猶謂執政抑之故授翰林編修滿考遷  
侍講修憲廟實錄成進右春坊右諭德公居翰林日杜  
門讀書為古文章使門者謝客勿通刺即一見之亦不  
輕報謝以是得簡貴聲而人愈慕之久之乃以薦拜侍

講學士經筵日講公每進講至天理人欲君子小人之  
互勝輒拳拳致詳上有所幸中貴人廣頗導遊西苑左  
右諫不聽公為講文王不敢畋遊章上罷講以謂廣曰  
講官所指殆若曹耶好為之自是游益省矣選東宮寮  
為少詹事兼學士遷吏部右侍郎所上籌邊八事多見  
採納會其父憂歸服除仍故職正德初九卿伏闕上疏  
請誅中貴人瑾等召至左順門使它中人詰所由諸九  
卿相懾唯唯獨公以危言繼尚書文後事幾濟而變瑾

等業不知也公遂從廷議以左侍郎兼學士入內閣踰  
月進戶部尚書兼文淵閣大學士未踰歲超加少傅兼  
太子太傅武英殿大學士會公救故尚書文大夏右都  
御史一清罪請成廢后吳氏喪稍與瑾意忤而初議亦  
微露公益自危乃堅請歸賜璽書給驛與廩良厚公凡  
兩典鄉會試其程文為本朝冠海內博士弟子亡不傳  
習之而千古文辭在河東廬陵間精簡有法度凡歸之  
十四年而世宗即位舉故事遣行人存問賜金幣益興

廩一時存問者將十人而公獨上書且以所著講學勤政篇進優詔報聞卒年七十五贈太傅所著集二十餘卷今像豐碩而敦鬚強半白衣蟒繡蓋歸田後所寫也贊曰孝宗以還實始風雅而擅經術如公益寡追正德時厄同白馬公以相歸卒老牖下完爵完身併以名完匪德之難完福為難俯仰世才寥焉愴歎

吳立齋公洪字禹疇吳江人舉進士為南京刑部主事歷員外郎郎中明允而慈時時出家廩以食長繫者久

之擢貴州按察副使母喪歸服滿補廣東巡視海道海道故稱利藪公搜其弊且盡又為御史畫策得羨錢數萬緡以廣公署持中官之困官舟者又嘗辨異寃罪妄殺廣人稱之為副使之十二年而轉福建按察使瀕行閩帥夜走索珠贐曰公行矣某非有所干毋疑也公笑曰行者贐不有一束書乎而何以珠為立卻之其為福建所治獄畧如廣東嘗以便宜發粟賑建寧延平之饑者入為太僕寺卿久之遷工部右侍郎理易州山厰轉

左侍郎拜南京刑部尚書治鄧寧河之後田宅於中貴人瑾有忤勒致仕致仕之十五年再進階而後卒得壽七十八公卒時諸子山巖皆至大官其後顯者不絕今像白皙而麗為太僕時圖于吳文定邸者也

贊曰嗟乎公一法吏子繼之復廷尉民不冤用長世司寇吳考及嗣始為郎旋正位慶之餘衍來裔

龔公弘字元之嘉定人也舉成化戊戌進士司理嚴州入為南京刑部四川司主事遷廣東司員外郎司事



等業不知也公遂從廷議以左侍郎兼學士入內閣踰  
月進戶部尚書兼文淵閣大學士未踰歲超加少傅兼  
太子太傅武英殿大學士會公救故尚書文大夏右都  
御史一清罪請成廢后吳氏喪稍與瑾意忤而初議亦  
微露公益自危乃堅請歸賜璽書給驛與廩良厚公凡  
兩典鄉會試其程文為本朝冠海內博士弟子亡不傳  
習之而千古文辭在河東廬陵間精簡有法度凡歸之  
十四年而世宗即位舉故事遣行人存問賜金幣益興

廩一時存問者將十人而公獨上書且以所著講學勤政篇進優詔報聞卒年七十五贈太傅所著集二十餘卷今像豐碩而敦鬚強半白衣蟒繡蓋歸田後所寫也贊曰孝宗以還實始風雅而擅經術如公益寡追正德時厄同白馬公以相歸卒老牖下完爵完身併以名完匪德之難完福為難俯仰世才寥焉愴歎

吳立齋公洪字禹疇吳江人舉進士為南京刑部主事歷員外郎郎中明允而慈時時出家廩以食長繫者久

之擢貴州按察副使母喪歸服滿補廣東巡視海道海道故稱利藪公搜其弊且盡又為御史畫策得羨錢數萬緡以廣公署持中官之困官舟者又嘗辨異寃罪妄殺廣人稱之為副使之十二年而轉福建按察使瀕行閩帥夜走索珠贐曰公行矣某非有所干毋疑也公笑曰行者贐不有一束書乎而何以珠為立卻之其為福建所治獄畧如廣東嘗以便宜發粟賑建寧延平之饑者入為太僕寺卿久之遷工部右侍郎理易州山厰轉

左侍郎拜南京刑部尚書治鄧寧河之後田宅於中貴人瑾有忤勒致仕致仕之十五年再進階而後卒得壽七十八公卒時諸子山巖皆至大官其後顯者不絕今像白皙而麗為太僕時圖于吳文定郎者也

贊曰嗟乎公一法吏子繼之復廷尉民不冤用長世司寇吳考及嗣始為郎旋正位慶之餘衍來裔

龔公弘字元之嘉定人也舉成化戊戌進士司理嚴州入為南京刑部四川司主事遷廣東司員外郎司事

最劇所治獄大小百五十餘咸當進吏部文選郎中出  
守兗州府以治行卓異與宴賞久之擢浙江右參政以  
親老乞歸養凡十三年始起為福建右布政使遷湖廣  
為左使尋入應天為尹以都察院右副都御史總理河道  
兼督漕運仍故職為工部右侍郎兼僉都御史累疏乞  
休進尚書致仕卒年七十有六公為人廉潔尤以明慎  
能剖讞冤獄時人神之所至多惠政當正德中中貴武  
臣更擅權勢數與公值公行意自若獨不能有所加進

退綽如也王父少司馬與公同年碩交而俱有方面勲  
俱稱天下長者

贊曰懿懿龔公行修而端政理甫暢而歌考槃歸侍二  
親菽水承歡起領閩藩載游楚沅遂寄留尹作砥揚瀾  
玄圭告成公乃即安進大司空歸老之官藹藹桑榆西  
日未殘進退以道生死毋僞

楊南峯先生諱循吉字君謙吳縣人舉進士授禮部儀  
制司主事先生敏洽工古文辭居曹事簡好讀書然頗

鬱鬱不得志乞改校官便養不許遂請致仕時年僅三十天下聞而稱之居十二年而上書復請建文帝號禮曹為大驚不敢舉其案賴天子寬仁不罪也先生既負高簡癖又好以學窮人徃徃至頰赤而久廢中不能亡動意顧亡能尉薦之者武廟南狩至金陵以名故驛召先生至則命樂府小令試之且將授伶官職先生大愧私于幸臣得免歸而先生名大損然其為辭益甚顧尚書華玉時以藩伯道吳用一幣贄先生促膝論文事歡

如也郡伯為會折簡邀顧公先生忽色變起策之出曰  
野人安敢與郡公爭客戒其子來曰以前幣置舟所即  
返呼之慎無應也顧公尋跡先生往謝罪竟閉門不出  
顧公每舉謂人過吳不可不造楊先生亦毋易造楊先  
生先生晚節益落莫嘗自為生誌卒年八十九所著有  
詩文集金小史吳中往哲記奚囊雜纂諸書今像如其  
年尚猶使人畏之

贊曰才太高跡太奇始而服中而疑終而非噫先生何



最劇所治獄大小百五十餘咸當進吏部文選郎中出  
守兗州府以治行卓異與宴賞久之擢浙江右參政以  
親老乞歸養凡十三年始起為福建右布政使遷湖廣  
為左使尋入應天為尹以都察院右副都御史總理河道  
兼督漕運仍故職為工部右侍郎兼僉都御史累疏乞  
休進尚書致仕卒年七十有六公為人廉潔尤以明慎  
能剖讞冤獄時人神之所至多惠政當正德中中貴武  
臣更擅權勢數與公值公行意自若獨不能有所加進

退綽如也王父少司馬與公同年碩交而俱有方面勲  
俱稱天下長者

贊曰懿懿龔公行修而端政理甫暢而歌考槃歸侍二  
親菽水承歡起領閩藩載游楚沅遂寄留尹作砥揚瀾  
玄圭告成公乃即安進大司空歸老之官藹藹桑榆西  
日未殘進退以道生死毋讐

楊南峯先生諱循吉字君謙吳縣人舉進士授禮部儀  
制司主事先生敏洽工古文辭居曹事簡好讀書然頗

鬱鬱不得志乞改校官便養不許遂請致仕時年僅三十天下聞而稱之居十二年而上書復請建文帝號禮曹為大驚不敢舉其案賴天子寬仁不罪也先生既負高簡癖又好以學窮人徃徃至頰赤而久廢中不能亡動意顧亡能尉薦之者武廟南狩至金陵以名故驛召先生至則命樂府小令試之且將授伶官職先生大愧私于幸臣得免歸而先生名大損然其為辭益甚顧尚書華玉時以藩伯道吳用一幣贄先生促膝論文事歡

如也郡伯為會折簡邀顧公先生忽色變起策之出曰  
野人安敢與郡公爭客戒其子來曰以前幣置舟所即  
返呼之慎無應也顧公尋跡先生往謝罪竟閉門不出  
顧公每舉謂人過吳不可不造楊先生亦毋易造楊先  
生先生晚節益落莫嘗自為生誌卒年八十九所著有  
詩文集金小史吳中往哲記奚囊雜纂諸書今像如其  
年尚猶使人畏之

贊曰才太高跡太奇始而服中而疑終而非噫先生何


所歸

陸公完字全卿長洲人也狀魁梧有巨人之度三十舉進士即授監察御史嘗按河南而行部之湯陰夜夢冕丈夫來見鼻左有黑志次日謁岳忠武王飛廟廟貌圯矣而像之鼻左微蝕若志者悟而飭有司一新之復夢前丈夫來鄭重謝已而慘然曰公得無類我乎公後歷臬副長以左僉都御史撫宣府入為兵部右侍郎轉左侍郎時大盜劉六劉七楊虎齊彥明等剽投山東河南

以至畿甸其鋒莫敢當議置帥而公奮請往討之詔以原官提督軍務許便宜行事公鼓舞諸將連摧破之遂追而蹙之大江狼山悉殲其衆自都察院右都御史進左都御史加太子少保再進兵部尚書加太子太保改吏部尚書進加少保公以書生當仗鉞寄節制萬里立功故國遂長中臺董六師領百官威望甚重而其在按察使時為寧王宸濠所器既入兵部而王持之以中貴人緹騎帥之挾遂不能堅所守許之復護衛亦有所賕

謝最後王反獄株累併逮繫公且繫歎曰武穆之祥其  
在今矣既論死未減得成福建久之卒於戍所年七十  
公頗讀書通曉文事好集法書名畫之類其功名雖不  
終尚為後進喜事者所稱

贊曰疇謂吳兜而不習兵千里一麾前無堅衡入長中  
臺遂領樞庭保阿統均天子所憑吳閭之間有雲其霓  
弗慎厥藩棟折榱傾易不終日而介在貞



弇州續稿卷一百四十七




所歸

陸公完字全卿長洲人也狀魁梧有巨人之度三十舉進士即授監察御史嘗按河南而行部之湯陰夜夢冕丈夫來見鼻左有黑志次日謁岳忠武王飛廟廟貌圯矣而像之鼻左微蝕若志者悟而飭有司一新之復夢前丈夫來鄭重謝已而慘然曰公得無類我乎公後歷臬副長以左僉都御史撫宣府入為兵部右侍郎轉左侍郎時大盜劉六劉七楊虎齊彥明等剽掠山東河南

以至畿甸其鋒莫敢當議置帥而公奮請往討之詔以原官提督軍務許便宜行事公鼓舞諸將連摧破之遂追而蹙之大江狼山悉殲其衆自都察院右都御史進左都御史加太子少保再進兵部尚書加太子太保改吏部尚書進加少保公以書生當仗鉞寄節制萬里立功故國遂長中臺董六師領百官威望甚重而其在按察使時為寧王宸濠所器既入兵部而王持之以中貴人緹騎帥之挾遂不能堅所守許之復護衛亦有所賕

謝最後王反獄株累併逮繫公且繫歎曰武穆之祥其  
在今矣既論死未減得成福建久之卒於戍所年七十  
公頗讀書通曉文事好集法書名畫之類其功名雖不  
終尚為後進喜事者所稱

贊曰疇謂吳兜而不習兵千里一麾前無堅衡入長中  
臺遂領樞庭保阿統均天子所憑吳閭之間有雲其霓  
弗慎厥藩棟折榱傾易不終日而介在貞



弇州續稿卷一百四十七

欽定四庫全書

集部

弇州續稿卷一百四十八

詳校官編修臣潘庭筠

侍讀臣孫球覆勘

總校官進士臣楊懋珩

校對官編修臣徐立綱

謄錄監生臣任穎

欽定四庫全書

弇州續稿卷一百四十八

明 王世貞 撰

吏部

像贊

都察院右副都御史毛礪庵公瑄字貞甫吳縣人也舉  
成化丁未進士久之授南京工科給事中與其僚先後  
紆守脩太監蔣琮兩廣總鎮安遠侯柳景不法咸抵罪

又抗論輔臣丘文莊公以該博佐剛愎為學士則有餘  
為宰執則不足時人避之病告起北戶科進兵科右以  
言事失大司馬指大司馬為冢宰公出叅議山東以病  
乞休進左叅政仕凡十年起為南京鴻臚卿轉太僕卿  
進右副都御史督操江改撫治鄖陽公長身瘦勁在諫  
垣以言事著節居官有聲實故歸而人頗薦之然以致  
仕加級法不得起而所善同年陸太宰特起之又屢得  
要遷公意不自安乃乞歸年八十二以老病卒公為人

欽定四庫全書

弇州續稿卷一百四十八

明 王世貞 撰

吏部

像贊

都察院右副都御史毛礪庵公瑄字貞甫吳縣人也舉  
成化丁未進士久之授南京工科給事中與其僚先後  
紆守脩太監蔣琮兩廣總鎮安遠侯柳景不法咸抵罪



又抗論輔臣丘文莊公以該博佐剛愎為學士則有餘  
為宰執則不足時人避之病告起北戶科進兵科右以  
言事失大司馬指大司馬為冢宰公出叅議山東以病  
乞休進左叅政仕凡十年起為南京鴻臚卿轉太僕卿  
進右副都御史督操江改撫治鄖陽公長身瘦勁在諫  
垣以言事著節居官有聲實故歸而人頗薦之然以致  
仕加級法不得起而所善同年陸太宰特起之又屢得  
要遷公意不自安乃乞歸年八十二以老病卒公為人

質直勤儉善議論多材力有籌策之畧其治生累貲至巨萬而名不損

贊曰南垣風采東省張施知難而退哲人炳幾再起九列以佐中司於秩則隆躍者疑之歸而治生計然我師江西右布政使諱秩字循伯其先亦即丘貞子之裔也不知所自從故與余父少司馬公通宗而不名族蓋稱王父曰叔父二十八成進士為郎久之始遷廣東按察僉事時大璫瑾責謝賄公獨不賄瑾亦不問為僉事持

屈遷兵備贛州為副使獻決益精明數擒巨盜遂進江  
西按察使遷右布政使姚源大盜起公數從事兵間躬  
冒矢石擒斬無算然不專逞誅僇所撫降者多曰彼亦  
赤子也時公與同年陸太宰先後官其地皆吳人而皆  
為寧王所器重王尤念公至欲媾姻好公遂巡謝不敢  
當歸謂其子曰是人也志滿而氣揚好武事善張大必  
且為亂不出十年矣遂以待養歸會暴得疾卒後王果

反太宰坐株累抵罪

贊曰公有方面勲江西之政與陸齊名而屈於壽其用  
不究於戲用之不究者乃所以保其身後耶

毛百歲翁者諱弼吾州里舍子也少敦厚無飾言垂九  
十而其孫少保澄狀元及第當是時少保父已卒而翁  
老病卧床第間久之得杖乃稍稍起且起且卧耐進粥  
竟至百歲有司為立人瑞坊以配少保而後卒正得百  
歲矣後贈禮部尚書今像殊怪偉可畏

贊曰生而百歲人之瑞有孫及第家之瑞秉禮遵義天下瑞

毛文簡公澄字憲清號白齋晚更曰三江吾州人也舉進士第一人為翰林修撰修會典成進右春坊右諭德侍東宮講讀以登極恩進左庶子兼侍讀為經筵日講官賜金帶母喪歸尋以中人瑾摘會典誤落左庶子服除仍侍讀明年遷侍講學士又明年進學士掌院事教習庶吉士擢吏部右侍郎轉左侍郎進禮部尚書賜玉

帶正德末充奉迎使與大學士儲迎今上於興邸賜白金千兩綵幣十有副尋加太子太保錄世蔭錦衣指揮固辭久之乞休加太子太傅道卒贈少保公孝友天篤性簡易不設城府好推轂賢士大夫迫問之則曰吾不記也至其所職司乃介然見勇氣議僂宸濠發王書告廟一以故典行之又嘗與王大司馬瓊廷諍脫彭總制於死當推冢宰力辭之而以薦喬莊簡公追崇獻皇帝禮議起公與楊文忠諸公力持數四至觸天怒不為阻

迨公歸而後禮成識者謂亡論禮是非公幾不足而忠有餘矣

贊曰言若不出口而折羣喙貌若不勝衣而樹孤砥步武卿相而守若處子出入旃夏而視猶閭里其柔為用而剛為體者耶

吳文端公一鵬字南夫長洲人也弘治中舉進士改翰林庶吉士授編修預修道鑑纂要滿考進侍講充經筵講官預修孝廟實錄成當遷時中貴人瑾怒公等不時

謁用擴充政務調遷公南京刑部員外郎轉禮部郎中  
瑾伏法公仍為侍講以久次遷侍講學士出為南京國  
子祭酒轉太常寺卿仍南京世宗初始召拜禮部右侍  
郎轉左侍郎奉詔使安陸題獻皇帝神主竣事賜金幣  
尋以左侍郎兼翰林學士掌詹事府典內制修武廟實  
錄完賜金幣優等進尚書予告歸省還出理部事再加  
太子少保南京吏部尚書垂一考乞致仕許之給輿廩  
有加公貌穎秀而龐饒器量寬然長者為文亦典腴有



成弘間風居翰林垂二十年不遷而以史成得南曹郎  
尚書以下多故舊跼蹐不安公抱紲自若學士故不當  
祭酒祭酒不當南公得南祭酒祭酒不當南太常公得  
南太常南太常不當久公獨久尚書內典制不當出理  
部公獨出理部禮部尚書非得罪不南公以遷命南人  
皆為不平且意有沮之者公亦不以形辭色歸凡十四  
年而後卒卒之歲得八十有三贈太子太保予祭葬  
贊曰以恬養資不求速榮以樸養文不求速稱八座青

宮既豐且亨八表文端遐考令名譬彼大河不匱不盈  
祁州守天方張先生安甫字汝勉篠菴先生之從子也  
先生生而秀朗工屬文登弘治庚戌進士授祁州守以  
節惠著聲論最當擢會丁母憂歸服除意不欲出曰仕  
為親養耳親今安在徘徊久之乃上疏乞休馬端肅公  
在冢宰異之曰宦垂就而弃若脫屣真恬士也特奏進  
二級有金緋先生鑿方池築亭其上因自號天方環植  
卉竹左圖右書吟哦其間意豁如也先生優游里居餘

三十年而子寰復貴又能弃官侍養以故益自寬於吳越名山水無不游游輒有題咏若馬鞍澱山巴城諸勝固几案間物耳先生瀟洒自得與人處和而不流公府居間盡絕以故晚節望益尊時與大司寇周康僖公齊稱而先生獨不以位顯年八十四元旦忽謂寰吾其歸乎蓋三月而示微疾臨終脩然若脫者邑與祁俱有祠贊曰仕而逸

闕

而葆真挫名名依抑志志伸匪道匪

釋消搖自在游方之內亦游方之外彭澤恨天香山慙

貴所不殊者坦中無累

祝京兆先生允明字希哲長洲人生而枝指故自號枝  
山又曰枝指道人先生天質穎絕讀書目數行俱下於  
古載籍靡所不該浹自其為博士弟子則以文辭稱而  
不能致深湛之思以故雅鄭時揉錯然至成弘際名能  
復古者先生蓋先登矣書法魏晉六朝至顏蘇米趙無  
所不精詣而晚節尤橫放自喜故當為明興第一為人  
好酒色六博不檢勵頗不受方內士賞許其令興寧政

術顧時時以嗜好奪之遷應天府通判致仕所著祝子通祝子雜罪知蠶衣浮物記語怪蘇材小纂興寧志合詩文數百卷卒年六十七今像乃朝衣冠老矣而尚腴澤或云不能全類之

贊曰先生之文縷古飾今其為詩歌庀景匠心獨於八法形而下者蠕蠕十指若役造化超明轢宋與唐上下跌宕沈冥景純斯亞

都南濠先生穆字玄敬由丹陽徙為吳縣人先生生而

嗜學能為古文辭數奇不得補博士弟子教授里中時  
吳文定公以少宰憂歸里奇而言之撫臣何公提學林  
公檄入應天試遂中式又三年而成進士授工部都水  
主事改南兵部武庫已遷虞衡員外郎進主客郎中年  
五十四乞休吏部賢之為請於上以太僕少卿致仕又  
十四年而卒先生為郎數奉使必游游必凌幽險探奇  
勝攷究掌故摻金石古文摹搨抄錄亡少挂漏歸老之  
日門無雜賓竈不突烟意澹如也惟日以雙言討著述為

事卒之日家唯藏書數十卷所著有南濠詩畧文跋詩話賓話玉壺冰聽雨紀談周易攷異史外類鈔金璫琳瑯學士大夫爭購而藏之以為帳中秘今像雖冠進賢服金紫居然一山澤臞也

贊曰強仕而儒以為數竒誰與辟之伴歌賓詩婆娑一官未老乞歸誰與旌之伴易金緋難進易退其容淵淵博學多識其腹便便末路翕嘗疇白疇堅猗歟先生獨全其天

唐六如先生寅字子畏一字伯虎吳縣之吳趨里人以  
諸生舉鄉試第一當赴會試而有所同載者以賄主司  
得題事株累罷為吏謝弗就先生材高少嗜聲色既坐  
廢見以為不復收益放浪名教外嘗一赴寧王宸濠聘  
度有反形乃陽為清狂不慧以免卒年五十四先生之  
始為詩奇麗自喜晚節稍放格諧俚俗冀托於風人之  
指其合者猶能令人解頤盡品高甚在五代北宋間今  
像頗質而野顧猶襲太學衣裾若重戴者可悲也



贊曰奪汝薦冒以掇汝何忍讒面醜樸其外文其中吐  
惜哉以樂窮以窮工藝乃終

朱恭靖公希周字懋忠其先崑山人徙居吳公初釋褐  
為翰林修撰修會典成遷侍讀久之中人瑾矯制奪侍  
讀仍為修撰再以實錄完復侍讀進侍讀學士遷南京  
吏部右侍郎轉禮部再轉左侍郎進南京吏部尚書公  
敦謹誠厚性自規矩以狀元及第六品二十年不遷意  
澹如也佐禮部屬大禮垂成諸輔臣相繼罷去公猶持

舊說婁忤上旨時方貴操切而公司大察而科臣無與者或謂公私之故公抗章自辨言科臣故應考者少即臣以言路私之固不可如避言路嫌而誅責之尤不可且臣老不稱職唯有去耳上雖難公去而公意益決溫旨給夫廩良厚公歸近三十年中外薦者近百疏竟不起公之為恭敬雖匹婦孺子毋敢慢取予即一介不苟吳俗薄而內嚴畏公有不善曰吾何以見朱公其黠者曰秘之幸毋使公知也公舉狀元以丙辰猶及見新丙

辰狀元而後卒卒之年八十有四賜祭葬贈太子少保  
今像頽然一翁而謙謙抑抑小物克勤之意可掬

贊曰公之乞歸威鳳漸鴻天下儀之公為長者祥麟騶  
虞天下化之無用之用其用乃弘公存吳重公歿吳輕  
豈惟吳輕世悲老成

周康僖公倫字伯明別號貞菴崑山人中弘治丙辰會  
試歸葬其祖母以己未廷試除保定新安令有政聲入  
為監察御史時武廟初即位所上封事多剴切巡居庸

闕以憂歸服除補故官出按山西還掌諸道老成不阿  
激遷南京大理寺丞久之為大理右少卿尋擢都察院  
右僉都御史佐院事復以憂歸服除起佐南院提督操  
江尋轉右副都御史佐院如故遷南工部右侍郎俄改  
兵部右侍郎時上欲振風紀以大學士張公璉掌都察  
院而公佐之轉左侍郎尋進南刑部尚書未上召為刑  
部尚書時大學士桂公夢去位而給事中應奎燦所論  
桂客李鶴鳴等事頗有連同去位者張公至天津而返

好謂公桂亦闕

矣為寬鶴鳴獄以待公謝不敢旬日

南刑部尚書

闕

推左侍郎許公讚內批以公補南而許

公代之公居南刑部無害以七十乞休不允尋得請致

仕里居凡十年而卒贈太子少保公之歸頗與其鄉里

老人為詩酒社善大書有眉山豫章風骨當是時天下

以公為長者而亟用之所至少官謗然不能如其子精

覈成名法家

贊曰當公之前務于抗人主以伸三尺當公之後務屈

其三尺以希人主色公劑其間不隨不激幸而非久乃  
獲全璧然所謂康者淵源流通公則近之而至於僖之  
小心畏忌則不若靖之寬樂令終也耶

文衡山先生者初名璧字徵明云故丞相天祥裔也避  
其祖璧諱以字行更字徵仲長洲人十六而父溫州公  
林歿於官郡寮合數百金賻先生邵之曰孤不欲以生  
污逝者既服除補諸生下帷讀書恒至丙夜而以其才  
傍及諸執文及書繪皆精絕先生所嚴事故吳尚書寬

李太僕應禎沈周先生而友祝允明唐寅徐禎卿吳徐  
工古文歌詩吳又能書李祝工書祝又能古文歌詩沈  
唐工繪事又能歌詩而皆推讓先生以為不可及先生  
小隸師右軍父子古隸師鍾梁畫師龍眠吳興尤精絕  
詩得中晚唐格外趣獨于文取達而已而其試亦不利  
久困諸生中甫貢而臺使者薦之試吏部得翰林待詔  
預修史史成賜金幣時故相楊文襄公張文忠公皆貴  
用事爭欲客公而公不徃亡何致其事歸先生歸而以

翰墨自娛造請戶屢長滿顧所許獨書生故人子屬為  
姻黨而官者即強之竟日不倦其他郡國守相貴戚連  
車騎富人子行珍寶里門外不能博一赫蹏而先生所  
最不輕許者藩王中貴人曰此國家法也蓋正德中寧  
邸以厚幣聘先生固謝不肯往未幾寧敗天下稱之先  
生暇則一出遊近地佳山水所至奉迎恐後居間客過  
從焚香煮茗談古書畫彞鼎品水石道吳中耆舊使人  
忘返如是者餘三十年年九十而卒卒時猶為人書志



石停筆惘然若蝶化者人以為仙去不死也余故嘗識先生今像最逼真

贊曰先生之才以迨書繪庶幾吳興所獨勝者高蹈蚤引卒完厥名先生之詩以逮壽考小喻務觀所尤勝者不以文事受役平原能使吳雅能使吳敦能使吳重誰言不用不用之用斯其為用

盛值菴公應期字斯徵寅之後也徙家長洲二十成進士授都水主事治濟寧閘公始為持法矯伉鄉人吳少

宰寬過而稽故之旬日吳公不以為忤公自是益發舒  
戚里近倖有挾私物者輒沒之時中貴人李廣憑上寵  
橫甚其家人憚公威投齏水中以是羣慙公廣怒嗾其  
黨秦文誣公逮下錦衣獄謫丞雲南安寧驛擢祿豐令  
稍遷順慶通判奔父喪歸服除為長沙府同知進雲南  
按察僉事分巡金滄道公前後所蒞以公彊廉節稱其  
在金滄尤能折土酋角坐持鎮守中貴人梁裕姦私為  
所中復逮下錦衣獄諸大臣言官救之得釋而前已進

其省副使乃之任超為河南按察使歷河南右布政使  
以至左公復與鎮守中貴人廖鑾軋伺得其陰將論之  
鑾伏乃已時武皇帝幸榆林公不加賦而供張悉備幸  
即彬從欲有所苛責公不應卒亦不能害也亡何拜都  
察院右副都御使撫四川平天全招討高文林及流賊  
謝文儀亂璽書褒獎賜金幣以繼母喪歸服除起撫江  
西有惠政進兵部右侍郎仍兼副都御史督兩廣軍事  
公至欲以氣壓節帥監軍且大有所振刷而謗起矣尋

破歸善賊及思恩土酋後先斬首虜二千二百俘半之  
方論功而公以避言得改工部右侍郎理易州山闕

謝病歸河決徐沛特起公都察院右都御史治之公上  
議四策曰疏曰濬曰築曰改疏者疏上流而殺之濬者  
濬故道而順之築者築長堤而障之改者改則地而不  
與之爭詔曰可其以春和興而公業用便宜行事大調  
兵夫倬上言者援詔書劾公不待旨輒發盛冬困吏士  
冰雪間上怒奪公職歸凡七年以廟恩復致仕尋卒年

六十餘公氣矻矻不肯屈下人其數蹟也或望之故然不能不思其材也今像亦稱是

贊曰是為直臣於弘治為材臣於嘉靖之世夫以君仁則臣直君明則臣材能一伸之而不能竟者何哉

蔡林屋先生羽字九達居吳縣之洞庭西山因自號林屋山人先生生而警穎能讀古文奇書既長工屬文又能為歌詩高自標榜以為韓柳不足言吾所撰著先秦兩漢少陵不足言吾於篇章建安西京或謂稍近濃雋

不至吳中單薄者而已正行書亦適勁間臨蘭亭十七帖人或從傍指摘其離者先生曰不然吾非臨右軍吾乃教之為諸生與文待詔徵明齊名而已他執不盡能頡頏其外若相善內不伏也為諸生者四十年而貢以太學上舍就選人尚書意憐之曰此故蔡生耶授南京翰林孔目二載致仕歸卒年七十餘無子今像目稜而頤張鬚蜎磔老矣而氣不衰

贊曰士有顯晦兮造物權之為丈慕古今誰則憐之躑

躅兮而竟弗前侘傺兮而猶自憐歸來兮西洞庭之石田

顧東橋先生者諱璘字華玉其先吳縣人也徙家留都為江寧人先生二十一成進士為詩歌與劉麟元瑞朱應登升之齊名曰江東三才子由郎署出守開封坐累謫入為南京吏部郎復守台州歷藩臬所至有聲實自山西臬再遷浙江左布政使轉巡撫山西右副都御史引疾乞休吏部言其太驟以布政使致仕先生居閒無事

多縱游山水間觴詠自適者十餘年而始起家巡撫湖  
廣入為吏部右侍郎以督顯陵工留為工部左侍郎兼都  
御史陵工成進尚書兼修承天大誌先生開局聘楚故  
名士官廢者王廷陳顏木王格分任之書成乃不稱旨  
遷南京刑部尚書被論致仕卒所著有息園諸集若干  
卷先生詩富才情格不必盡古而以風調勝往往贈炙  
人口文小弱然亦宛宛雅趣延接名流如恐失之有第  
璫以按察副使謝病歸才不能如先生而峭厲過焉



贊曰弘正之間天昌厥辭李何開之邊王翼之跋蹠中原  
江左具誰昌穀後勁公乃先馳繇麗才情紆徐規矩六  
季風流庾鮑庶幾

都察院左僉都御史虞山陳公察字原習常熟人舉進  
士授南昌府推官入為監察御史按滇蜀久之遷太僕  
少卿謫潮州府教授復為信州倅晉浙江按察僉事俄  
超副使遂遷山西按察使山東右布政使浙江左布政  
使入為光祿寺卿改都察院左僉都御史提督南贛汀

漳軍務乞休歸卒年八十三公為人短小精悍負直節慷慨喜事其為御史數上章阻上巡幸建皇儲條數中貴人不法再奪歲奉最後上廷鞫給事中楊言怒甚公忽大呼曰臣願代楊言死上目攝公不為阻退而奏書極論之上竟不罪也其遷太僕垂六十矣而猶薦代人太僕例不當薦代人故謫所居官青衫款段再日一肉按數墨吏若仇歸而僻居監司守令過從者時出所飯麥飯佐以薇藿而強進之又作吳語刺刺是非不少借

以後進謁公者少有能得公色以故相率指摘公謂非情實余謁公公老矣強而談死節礪行之士猶張目齒擊云

贊曰公在國兮咸以為司直兮歸里兮或以為吊詭兮寧矯而徧兮毋瓦全兮寧無理口兮內無疚兮

周恭肅公用字行之別號白川吳江人舉進士授行人擢南京兵科給事中遷廣東左參議轉山東按察副使治臨清兵備進福建按察使河南右布政使遂以右副

都御史鎮南贛入佐理臺事遷吏部右侍郎轉左侍郎  
下除南刑部右侍郎尋遷右都御史長南臺為南工部  
尚書改刑部太廟災乞休里居者十載而以工部尚書  
召理河道改督漕運入為左都御史長臺事滿二品加  
太子少保尋改吏部尚書卒於官贈太子太保公有文  
行其為給事中侃侃不失職然亦不激詭所歷方面杖  
節領鎮俱以廉勤幹濟稱為侍郎四掌部事縉紳賢之  
坐尚書鉅所嫁禍下除公默默不自明以是益信其為

長者晚而秉憲握銓天下想望風采凡再司内外察見  
斥者不能修怨當是時貴溪分宜二相勢交軋公處  
之寬如也可謂高朗令終者矣

贊曰才不見長善無近名力雄萬夫外若不勝于垣于  
臺于鑑于衡是以令終顯融昭明吳江之清公與俱清  
吳江之平公與俱平

顧文康公鼎臣初名同以夢改今名字九和別號未齋  
崑山人舉進士第一為翰林修撰預修孝廟實錄遷侍

講轉左春坊左諭德兼侍讀世宗初為經筵日講官移疾予告久之病良已復官尋遷翰林院學士掌院事明年超拜詹事府詹事學士如故久之遷禮部右侍郎尋以吏部左侍郎掌詹事府事進禮部尚書兼掌如故屢教庶吉士監錄累朝寶訓實錄成加太子太保主考會試進兼文淵閣大學士皇天策表禮成加少保太子太傅兼武英殿大學士上南巡狩承天公佐皇太子監國其敕公有內自禁掖外而都城及邊陲并大小百司庶

務悉以付卿語蓋皇太子方幼冲上所以寄之于古亡  
兩去公長七尺虬鬚虎顴目炯炯射人聲吐如鐘性跼  
弛好聲酒及內人或以風之意殊弗屑也自其在班行  
上固以目屬之及進講益稱旨亟欲大拜而為故相乎  
敬所阻止然上內憐公即言路見抨射愈苦愈不聽也  
前後所賜白玉金寶束帶麒麟飛魚蟒服御書銀章金  
綺食物不可勝計公以病噎在告久之乃卒年六十有  
八贈太保賜祭及葬遣官護其喪歸所著有詩文雜集

合奏議凡若干卷公不好修鄉曲名以故少稱者而其  
所疏築邑城丈田均賦久而見其利始思之為疏乞專  
祠以祀詔曰可

贊曰高文大篇虎顴虬髯為多士魁為大臣師晚而登  
庸為帝所廢屯膏未施誰其尼之則壤城城沒始見祠  
魏恭簡公校字子才崑山之真義里人弱冠舉鄉試其  
明年舉會試登高等尋授南京刑部主事進郎中移疾歸  
召為兵部職方郎中不赴居久之起為廣東按察副使



提督學校父憂歸服除調補贛州兵備副使乞休再補  
河南按察副使仍提督學校入為大理少卿改國子祭  
酒以進講忤旨調太常少卿進本寺卿提督四夷館遂  
致仕中外交薦皆不起卒年六十一贈禮部右侍郎公  
始在郎曹時與故大司馬胡永清李立卿為經濟之學  
已與故少宰余子積為身心之學居恒謂上天之載無  
聲無臭惟潛龍近之其大要在主敬而敦踐履天下盛  
行王氏學公與之不甚合而其召用也實出故相萼當

是時故相璉忌而排之唯上亦以公迂不復用也公卒之日天下信以為賢長者而學廢不傳久矣余嘗獲侍公儼若寺所塑阿羅漢者今像僅志其大都耳

贊曰主敬之學實程叔子而公奉之務敦踐履凡所著書亡適非體是故講筵垂用而尼道之不行公其已矣此洙而微寧不悲只

徐迪功先生禎卿字昌穀吾州人也而徙於郡先生自為諸生即與唐寅文璧相唱酬有名而其語高者上仿

佛齊梁下亦不失溫李以為快既成進士始與大梁李夢陽信陽何景明善而夢陽稍規之古自是格驟變而上操縱六代而出入於景龍開元間初若更駕不受羈徐而察其步驟開闢鮮不中繩墨者當是時吾吳中獨先生能狎主中原盟而惜其蚤死不獲持牛耳然迪功集談錄藝亦足以雄矣先生為進士時上忽使中貴人問先生與陸深名顧深得館選先生弗得也授大理寺左寺副居久之鬱鬱不得志乞徙南便養而會以失囚改

國子監博士以貧病卒年僅三十三時王文成公守仁  
為吏部郎初與其儕談道先生驟見而悅之亡何卒王  
公為志銘意若欲當先生師而謂其詩與談藝錄皆非  
其至者操觚之士爭笑之先生貌戍削血不華色非飯  
顆吟瘦將亦通眉長爪之倫也故不如以詩名吐納何  
益矣王公語尤誕不情

贊曰詩途百端其流相傾餽釘為工酬闕驚聲弱者萎  
蕭强者憑陵吳之不競夫豈才情天發神秀乃鍾先生

孤鶴嘹唳威鳳騫騰蛾眉新月萬古春永惜哉中天竟  
寒齊盟

弇州續稿卷一百四十八